



7. januaari 2026

Inatsisartut Suleriaasianni § 37, imm. 1 naapertorlugu tulliuuttumi apeqqutit Naalakkersuisunut saqqummiuppakka.

Naalakkersuisunut apeqqutit:

1. Meeqquerivinni massakkut atorfiit akuerisaasut, sulisunullu massakkut sulinermi atugassarititaasut Naalakkersuisut qanoq nalilerpaat?
2. Meeqquerivinni sulisunik amigaateqarnerup, sulinermi tatineqarnerup, ulluinnarnilu meeqqat paarineqarnerisa pitsaassusaata akornanni ataqtigiinneq Naalakkersuisut qanoq nalilerpaat?
3. Meeqquerivinni tamani inimi ataatsimi atorfiit akuerisaasut minnerpaamik sisamangortinneqassagaluarpata tamanna aningaasatigut, allaffissornikkullu pisortanut qanoq kinguneqassava?
4. Atorfiit tunngaviusumik akuerisaasut amerlissagunik tamanna meeqquerivinni ulluinnarni paarlatseqartariaqartarnermut, sulisutigullu piaartumik aaqqiissuteqartariaqartarnermut qanoq sunniuteqassanersoq Naalakkersuisut qanoq nalilerpaat?
5. Perorsaasut iggavimmi suliassanik, eqqiagassanillu suliaqartariaqartarnerat ilanngullugu sulisut marloqiusamik suliaqartinneqartarnerat Naalakkersuisut qanoq isumaqarfigaat?
6. Uippakajaarnissaq, napparsimalluni sulinngittarnerit, sulisullu soraartarnerat pinaveersaartinneqarnissaat siunertaralugu, meeqquerivinni sulisunut sulinermi atugassarititat nukittorsarneqarnissaannut Naalakkersuisut qanoq isumaliuteqarpat?
7. Sammisamut soqutiginarturnik allanik Naalakkersuisut paasissutissiisinnaappat?

(Inatsisartunut ilaasortaq Pipaluk Olsen, Demokraatit)

Tunngavilersuut

Meeqqat atugarissaarnissaannut, ineriartornissaannut, toqqiissisimanissaannullu meeqqueriviit aalajangiisuupput. Ilutigisaanik meeqquerivinni sulisut ulluinnarni meeqqanut qaninnerpaasartut, meeqqallu paaqqutarinissaannut aamma ilinniartinnissaannut annertuumik akisussaafeqartut ilagaat. Tamanna pillugu sulinermi atugassarititaasut allanngujaatsumik, illersorneqarsinnaasumillu ingerlatsinissamut tunngavissiinissaat pingaaruteqarpoq.

Sulisunik amigaateqarnerup kingunerisaanik meeqquerivippaalunni sulisut sulinikkut ilungersunartumik inississinnaasarput. Taassuma kingunerisaanik iggavimmi suliassat imaluunniit eqqiagassat ilanngullugit



perorsaasut suliaasat arlallit ataatsikkut suliarisariaqarsinnaasarpaat, tamannalu piffissamik meeqqanut atugassaagaluamik annikillisisarlunilu sulisut ulaperulunnerinik kinguneqartarluni.

Atorfiit minnerpaatut akuerisaasut eqqartorneri ulluinnarni sinaakkutinik allannguajaannerusunik pilersitseqataasinnaapput. Tunngaviusumik inuttalersuineruneq illup iluani eqaannerulersitsinissamut periarfissagissaarnerutitsisinnaavoq, piaartumik paarlatsissarsiortariaqartarnernut annikillisisinnaavoq, meeqqanullu aamma sulisunut eqqissisimanerunermik, ataqatigiinnerusumillu pilersitsisinnaalluni.

Ilutigisaanik atorfiit akuerisaasut allanngortinneqassappata paasissutissiisumik, piviusorsiorpalaartumillu tunngavilimmik aalajangiisoqarsinnaaniassammat taassumap aningaasatigut, allaffissornikkullu kingunissaannik ersarissaassalluni pisariaqarpoq.

Massakkut inissisimanermut Naalakkersuisut qanoq naliliinerinik, meeqqanullu aamma sulisunut, inuiaqatigiillu ataatsimut isigalugit iluaqutaasussamik atorfiit akuerisaasut amerlinissaannut, sulinermilu atugassarititaasut nukittorsarnissaannut sunik periarfissaqarnerisoq paasinninnissaq apeqqutini siunertaavoq.

Apeqquteqaatinnut akissutit piffissaliussap ullut suliffiusut qulit iluini tigunissaat qilanaaraara.